

Date – 26/04/2026
Time - 7:30 -7:40 Hrs
AKASHVANI AIZAWL

HEADLINES (MORNING)

- 1. World Veterinary Day (WVD) 2026 chu nimin kha a ni a, hemi pual hian Aijal Club-ah "Veterinarians: Guardians of Food and Health" tih thupui hmangin hun hman a ni.**
- 2. Forest Minister Pu Lalthansanga chuan Forest Department chuan an theihtawp chhuahin thing leh mau an humhalh tih a sawi.**
- 3. India ram hmun dangte ang bawkin Mizoramah pawh hlawhtling takin Poshan Pakhwada 2026 chu hman a ni.**
- 4. Union Minister Manohar Lal chuan Urban Challenge Fund hnuaiah sawrkar laipui chuan kum li chhungin khawpui te hmasawna atan cheng vaibelche nuai khat a seng dawn tih a sawi.**

<><><>

VETERINARY DAY

World Veterinary Day (WVD) 2026 chu nimin kha a ni a, hemi pual hian Aijal Club-ah "Veterinarians: Guardians of Food and Health" tih thupui hmangin hun hman a ni.

Khuallian A.H & Vety. Secretary Pu Lalsangliana chuan, Ei leh bar dehchhuah bakah a hrisel em tih ngaihven thlengin Veterinarian-te an pawimawh thu sawiin, ran hriselna mai piah lamah ram leh hnam hriselna chu an kutah thui tak a inngah thu a sawi bawk.

AH& Vety. Secretary chuan Animal Husbandry & Dairying chu Sawrkar laipuiin a ngaih pawimawh thu leh a la tih len deuh deuh dawn thu a sawi a. Department hnuaia thawktute inpekna fakawm a tih thu sawiin, Sawrkar laipui atanga fakna awka dawn a ni chu lawmawm a tih thu a sawi a ni.

World Veterinary Day 2026 pual hian Aizawla hmun pathum - State Veterinary Polyclinic Hospital, Khatla, Thuampui leh Lawipu-ahte Free Health Clinic leh Free Anti-Rabies Vaccination Camp-te buatsaih a ni.

<><><>

FOREST MINISTER

Forest Minister Pu Lalthansanga chuan Forest Department chuan an theihtawp chhuahin thing leh mau an humhalh tih a sawi.

Mizo Zirlai Pawl (MZP) buatsaih Inter College Debate Competition chu tun hnai khan Vaivakawn Cultural Centre cum Auditorium-ah a hmawr bawk a ni a, he hunah hian Minister Pu Lalthansanga chuan thing leh mau te a chereu zawh vek chuan Global Warming a nasa chho zel dawn tih sawiin, chu chuan Economy a nghawng thei a ti a, hemi avang hian ramngaw humhalh zel a pawimawh tih a sawi.

Inter College Debate Competition-ah hian thupui pahnih 'Mizo hnam himna atan ILP hi a tha tawh a ni' tih leh 'Mizoramah zu zawrh hi a hun tawh a ni' tih hmangin College paruk an inel a, a pumuiah Govt. Hrangbana College chu pakhatna an ni.

<><><>

WEATHER

Tukin khawvar tirh khan Aizawl khawpuiah chuan thli a thaw nasa viau a, ruah a sur bawk - thli leh ruah hian hriat theih chinah thil tih chhiat erawh a nei lo a ni.

Pu Sudheer Kumar Dwivedi, Director, IMD, Aizawl hnen atanga Akashvani News Aizawl thu dawn danin, Champhai, Siaha, Lunglei leh Serchhip District-ah te chuan ruah tam vak lo sur thei dinhmunah a ding bawk a ni.

Fur ruahtui tlak hun a ni chho mek a, mi thiamte chuan India ram hmun dangte aiin hmar chhak state te chuan Monsoon kan dawng hma thin deuh niin an sawi a, thli leh ruah chu thawk mai thei reng a nih tawh avangin mitin fimkhur a pawimawh hle a ni.

<><><>

POSHAN PAKHWADA

India ram hmun dangte ang bawkin Mizoramah pawh hlawhtling takin Poshan Pakhwada 2026 chu hman a ni.

Anganwadi Center, Tuikhuahtlanga an worker Pi Lalhmangaihi chuan, Poshan Pakhwada pual hian Nu naupa thenkhat chu an Inah an kalchilh tih sawiin, heng bakah hian tunlaia naupangte buaina pakhat, phone en nasat lutuk a that lohzia inzirtirna te pawh an hmang nghal tih a sawi.

Akashvani News Aizawl in 'News Based Program' a siam atanga a lan danin, Anganwadi thawktute hian Poshan Pakhwada pual hian kawng hrang hrangin naupang te hriselna leh hmasawna turin an bei a, Anganwadi mai bakah Nu leh naupai kal chhuak thei lo te chu an chenna inah kalchilh an ni bawk a ni.

<><><>

PRESBYTERIAN MEET

Mizorama kohhran lian Presbyterian Kohhran chuan Pastor Bial hrang hrangah Bial Inkhawmpui an hmang mek a, zanin hian a tiak ang.

Nimin nileng khan rolrel niin, nizan khan Pathian Biak inkhawm neih a ni bawk. Vawiin Pathianni Chawhma, Chawhnu leh Zanah te vantlang Pathian Biak inkhawm neih a ni ang a. Chawhnu inkhawmah Lalpa Zanriah Sakramen theh a ni ang a, zan inkhawmah Bial Chairman kalchhuak turten Valedictory Sermon an sawi ang. Pathian Biak Inkhawm hun hrang hrangah thupui sawi tura ruatten thuchah an sawi bawk dawn a ni.

Inkhawmpui hman dan tur leh programme kimchang chu Bial Nomination Committee-in an ngaihtuah thin a. Bial Inkhawmpui hi April thla Pathianni vawi 4-naah neih thin a ni a, eng emaw rokhawlhna avanga hmang hma hret leh hmang tlai hret an awm bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MKCP

Mizoram Police ten Kuhva ro tawlhruk an man thin chu Mizoram Kuhva Chingtu Pawl, General Headquarters chuan lawmawm an tih thu an sawi.

Mizoram Kuhva Chingtu Pawl (MKCP) hian nimina thuhchhuah an siamah, hnathawktute hma khua ngaia dan lova ram pawn Kuhva ro tawlhruk Mizoram Police in an man chu lawmawm an ti a, Ram leilung fa Kuhva chingtuten Mizoram chung leh pawn lama kan thar chhuah ngei Kuhva an hralhna daltu, dan lova Kuhva ro tawlhruk an dem a, sorkar hmalakna kan thlawp takzet a ni, an ti.

Dan lova kuhva tawlhruk dapchhuahna leh man chhuah an nih theihna tur kawngah engtiklai pawhin MKCP chuan sorkar hmalakna an thlawp tlat tih an sawi a, Mizo mipuite pawh kuthnathawktute hma khawngaia lo hrethiam a, Kuhva tawlhruk dopui zel turin an ngen takzet bawk a ni.

<><><>

MANN KI BAAT

Prime Minister Narendra Modi-a'n vawiin chawhma dar 11-ah Mann Ki Baat hun, Akashvani-ah a hmang leh dawn a, radio-ah he hun a hman vawi 133-na tur a ni. Prime Minister thusawi hi

Akashvani leh Doordarshan network zawng zawng bakah AIR News website-ah leh Newsonair mobile app-ah te tihchhuah a ni ang a, AIR New, DD News, PMO leh Ministry of Information & amp;

Broadcasting Youtube channel-ah te, live-a pek chhuah a ni bawk ang a. Prime Minister thusawi, Mizo tawnga lehlin tihchhuah zui a ni ang.

<><><>

Union Minister on Urban Development

Union Minister of Housing and Urban Affairs Manohar Lal chuan Urban Challenge Fund hnuaiiah kum li chhungin sawrkar laipui chuan khawpui te hmasawna atan cheng nuai khat a seng dawn tih a sawi a. New Delhi-a The Housing and Urban Development Corporation Limited (HUDCO) din ni vawi 56-na lawmna a thu a sawinnaah , state sawrkar te chuan khawpui tih hmasawn nan nuai khat dang an sen dawn thu a sawi bawka. Minister chuan Urban Challenge Fund chu tun hnai khan pawm a ni a, Central Assistance zawng zawng cheng vaibelchhe nuai khat a ni ati.

He hunah hian Union Minister chuan HUDCO chu khawpui tih hmasawn nana an thawhlawk zia a fak a, Transit-Oriented Development (TOD) Policy hnuaiiah Metro station bul hnaiah in sakna tur project lian tak tak thawh tan a nih tur thu a sawi bawka. He policy hian mipuite tana metro connectivity tihpunna kawngah a pui dawn tih a sawi a, kum 20 lo awm turah khawpui hmasawna atan cheng vaibelchhe nuai sawmsarih vel hman a nih beisei a nih thu a sawi bawka ani.

<><><>

CDS

Chief of Defence Staff General Anil Chauhan chuan nimin khan US Pacific Air Forces Commander General Kevin B Schneider hmuin India leh US sipaite thawhdunna chungchang an sawidun. Sipai hotu pahnihte hian venhimna kawnga thawhdunna pawimawh tak takte an sawidun bawkah Indo-Pacific-a remna leh muanna tlo tak neih chhonzawm zel anih theih dan tur an sawidun a ni.

<><><>